

KOMDŽIĆ SO

- a) dolho za něšto trjebać, přepozdže přińć
- b) koleso wuporjedzić
- c) jědź a napoje nakupować

Prawa je wotmołwa a.

Komdžić so wužiwamy we wšelakich situacijach, kiž maja wšě něšto zhromadneho: Komdžimy so z nadawkom, jeli njeje wón sčasom hotowy. Komdžimy so w času, jeli přińdžemy přepozdže. Tež, hdyž njemóžemy so prawje rozsudzić a wahamy (štož zaso traje), so komdžimy.

Takle móžeš to tež prajić

so dlić_{ip}, so maslić, so (z něčim) parać_{ip}, pomału džělać_{ip}, sej čas brać_{ip}, čas přečinjeć_{ip}, dundać_{ip}, po slónčku do hribow hić (přepozdže z džělom započec)

Připódla prajene

W tutym zwisku mamy wjele wotwodženkow: Móžemy termin *skomdžić*, *zakomdžić* abo *zapasć*, jeli přepozdže přińdžemy. Porno tomu spjelnimy nadawk *bjez komdženja*, jeli jón hnydom dokónčimy.

Přikłady z rěčneho korpusa

Trjebam swój rukopis, kiž maš tola tak dolho žno k wotpisanju. Čehodla so tak *komdžiš*? (Achim Brankačk, Listowanje Bjarnata Krawca z Arnoštom Muku, Měranku Lešawic a Michałom Nawku, Budyšin 2001; Lětopis 48, Wosebity zešiwk)

Nimo toho pak je lěpje, zo z wudaćom so radšo lěto dlěje *komdžu*; přetož kniha Formow dyrbi być něšto dobre a dospołne po formje a technice, dyrbi džě to być kniha přikładow za potomkow. (Jakub Bart-Ćišinski, Zhromadžene spisy. Zwjazk 10. Listowanje, Budyšin 1975)

Staruška wokomik mjelčeše. „Ale to wam lěpje nětko njepowědam. Nochcu, zo so *komdžice*, žana z was sotrow nima chwile.“ (Jěwa-Marja Čornakec, Hołbik čornej nózce ma. Powědky, Budyšin 1999)